

COMUNICATO n. 1149 del 20/05/2024

Traduzione in cimbrio

Offe dar auzschraibung 2024 zo geba vèrt in kulturàl prodjèkte vo mearare kamöünder panàndar

[Cimbrio] Schützan zuargebante 'z gèlt boda iz mængl zo macha kulturàl prodjèkte vo mearare kamöünder bodase leng panàndar un boda hãm azpe zil in sèll zo macha a nèt看 zo macha khennen un zo geba vèrt in schatz boda aniagladar teritòrdjo hatt zo opfra un asó machan krescharn nèt lai bazta ågeat dar kultùr ma dar ekonomì un dar sotziàl pintom o; ditza iz 'z zil von provedimént, vorgelekk von vitzevorsitzar un asesór vor di kultùr, boda da provintziàl DJunta, bodase iz gevuntet an vraita atz 17 von madjo, bill az sai ànemmente in öffentlesche auzschraibung vorz djar 2024 boda ågeat in trentinar lânt emtar un boda nidarlekk di kritèrdje un bia zuarzugeba di schützt. Dar schützt steat å in provintziàl gesetz übar di kulturàln arbatn un asó azpe da auzmacht dar protokòll pittar lokàl finantzièll vor haür khemmenda untargelekk 500 tausankh euro.

Azpe da hatt khött dar asesór, dar provedimént bill gem vèrt in kulturàl, materièll un unmaterièll schatz, azpe strategesche eleméntn zo macha krescharn di lentar arbatante un machantese khennen auz von soìn geografesche konfin o. Bichte vor ditza iz innvången mearare sektör von lentar boda di prodjèkte khemmen vürgetrakk – turistìk, ekonòmege, welfare, umbèlteg, formatìf-didaktìk – un vürtrang kulturàln initziatìvan nå in sèll boda khint gevorst vo mearare kategorian nützar, zo macha ja azta da kulturàl opfar gea guat vor laüt boda nèt hërta stian nå disan sachandarn.

'Z bartnda mang khemmen vürgelekk kulturàln prodjèkte von Toalkamöünder odar vo mearare Kamöünder gelekk pittnàndar, odar azza soìn vürgelekk vonan uantzegen Kamòu di initziatìvan mochan khemmen gemacht in mearare kamöünder un innvången åndre emtar o saiz öffentlesche, saiz privètt, odar no ma haltet aztada nemmen toal laüt vo åndre kamöünder o, odar da hãm 'z zil zo macha a nèt看 vo mearare emtar, odar da gian å in Trentinar Biblotèkar Sistèm.

Dar vorsch zo haba in schützt, geat inngètt in Dianst vor di Kultùr un mocht khemmen geschikht ducht zertifikarata post afte pec: serv.attcult@pec.provincia.tn.it odar durch Ptre vor azta auz soìn di draitzekht tang azta iz khent auzgètt dar auzschraibung afte istituzionàl websait un daz mindarste an tage pellar vorda åhevan di initziatìvan vorgelekk.

Dar formulàt innzugeba in vorsch mage khemmen abegenump vodar wwebsait PAT aftn link: <https://www.provincia.tn.it/Documenti-e-dati/Modulistica>. Azta dar prodjèkt iz vo mearare kamöünder dar vorsch tarft khemmen inngètt vonan Kamòu darkhennt azpe Kamòu vorànavür. Berda bart vången in schützt bart mochan volng, senonda bartnsa khemmen auzgestrich, in regolamént von brand Eco-eventi Trentino.

Übarsetzt von Schaltarle vor di zung von Toalkamou vodar Zimbar Hoachebene

